

Futbola

IRIARTEK SANTIAGO BERNABEUN AZKEN JARDUNALDIKO HAMAIAKAKO BERA ZELAIRATUKO DUELA BAIEZTATU DU

«Galtzeko asko dugu»

Reala, «beldur eszenikorik gabe», Real Madrid gainditzen saiatuko da gaur Santiago Bernabeu zelaian (20.30, ETB1), «ekipo handien kontrako heldutasuna erakusteko» asmoz. Madrilgo taldean Fernando Hierrok eta Ivan Zamoranok ez dute jokatu, ez baitira lesioetatik osatu. Laudrup ez da titularra izango.

Enekoitz Esnaola / Donostia

IRAGARRITA zegoena baieztatu egin zuen atzo Salva Iriartek, hots, Rayo Vallecano gainditu zuen hamaikako bera zelairatuko duela gaur gauean Santiago Bernabeun. Ez zuen, hortaz, ezusterik eman beasaindarrak. Agian ustekabe bakarra Roberto Olabe atezainak ez bidaiatzea izan da. Gasteiztarra sorbaldako arazoe-kin dabil, eta Iriartek atzo zioenez, «besoa luzatzean oraindik ere min hartzen du. Hori dela-eta, hobe du beste egun batzuk itxaron». Arteaga sartu du deialdian entrenatzaileak. Olabe bezala, hemen geratu dira Gracia, Uria, Emery eta Luis Perez.

Asko hitz egiten da Bernabeuko beldur eszeniko delakoaz, baina Iriarteren ustez Realak ez du horrelakorik: «Beldur hori ez dugu izan, gu izan baikara azken urteetan Real Madridi, Barcelonari bezala, arazo gehien sortu diogun taldeetariko bat. Ekipo handien kontra, behintzat, heldutasuna dugula erakusten ari gara». Gainera, beasaindarrak ez du oraindik Madrilgo taldearen kontra galdu, 1994ko azaroan entrenatzaile kargua hartu zuenetik: «Realeko tekniko naizenetik hiru aldiz jokatu dugu Real Madriden kontra: bi Ligan eta beste bat adiskidantza partidu batean, eta hiru horietatik bi berdindu egin ditugu eta bat irabazi». Gaur ere ez galtzea garrantzitsua izango da, zeren eta «galtzeko asko dugu. Jokoan, beste partidu guztietan bezala, hiru puntu egongo dira, eta horien bila aterako gara», zioen atzo Iriartek.

Bernabeun jokatzeko amorratzen dagoena Gica Craioveanu da. Oraindik ez du golik sartu, eta bereziki gaur egiteko gogoia du. Meho Kodrok Bernabeun sartu zuen Realeko bere lehen gol ofiziala. 4-1 galdu zuten, baina.

Laudrup ordezkio, eta Hierro eta Zamoranok ez dute jokatu

Real Madridek lau baja garrantzitsurekin ekingo dio Realari. Batetik, Rafa Alkorta bizkaitarrak bi txartel hori ikusi zituen joan den jardunaldian Al-

baceteren kontra, eta ez du gaur jokatzetik izango neurketa bateko zigorra dela medio.

Bestetik, Fernando Hierro zentrala eta Ivan Zamorano aurrelaria lesioekin ibili dira, eta ia-ia osatuak baldin badaude ere, azkenean ez dira jokatzeko moduan izango. Madrilgo taldeak plantila zabala du, eta bere denboraldia luzea izango dela-eta, Jorge Valdano nahiago du ohiko titularrei atsedena ematea. Dena den, Argentinako entrenatzaileak baditu hauek ordezkatzeko arazoak; izan ere, Hierroren berezko ordezkioa den Alkorta, lehen esan bezala, ezingo du gaur gauean jokatu, eta Sanchisen bikotea Nando izango da, abenduan beste talderen batera joan daitekeen Nando hain zuten ere. Zamoranoren lekuan, bestalde, Esnaider ari da jokatzeko, baina argentinarra ez da asmatzen ari.

Azkenik, Valdano ez du hasierako taldean jarriko Michael Laudrup. Erabaki taktikoa da. Sandro izango da ordezkioa.

Salva Iriarte: «Beldur eszenikorik ez dugu, gu izan baikara azken urteetan Real Madridi arazo gehien sortu dioten taldeetariko bat»

«Beste partidu guztietan bezala, Bernabeun ere hiru puntu izango ditugu jokoan, eta gu horien bila aterako gara. Galtzeko asko daukagu»



Real Madrid

Bernabeu, 20.30

Marin Lopez



Reala

Entrenatzailea:
Jorge Valdano

Aulkian:
13 Cañizares
2 Chendo
14 Milla
8 Michel
10 Laudrup

Etxean:
Irabazi 2
Berdindu 1
Galdu 2
Golak alde 8
Golak kontra 7

Orokorrean:
Postua 8
Puntuak 15 +6

AZKEN EMAITZAK

89-90	3-0	91-92	4-1	93-94	0-2
90-91	2-3	92-93	2-0	94-95	0-0

Entrenatzailea:
Salva Iriarte

Aulkian:
23 Arteaga
6 Pikabea
18 Idiakez
14 Yaw
9 Purk

Kanpoan:
Irabazi 1
Berdindu 1
Galdu 3
Golak alde 5
Golak kontra 11

Orokorrean:
Postua 13
Puntuak 13 -4



Yaw aulkian geratuko den bitartean, titular izango den Craioveanu bere lehen gola sartzen ahaleginduko da. ANDER GILLENEA

Telebistatik

• ENEKOITZ ESNAOLA •

EZ Euskal Telebistak ez Espainiako Canal + kateak ez dute, orain arte, Realaren neurketarik eskaini aurtegoan. Gaur izango da lehen aldiz pantaila txikitik Real ikusiko duguna. Eta non eta Santiago Bernabeun ariko dira txuri-urdinak. Espainiako telebista batek lehen zioen bezala, lagun izango dugu, noski, pantaila.

Realak ere lagun ditu kamerak. Nire adiskide batek dioenez, Espainiako Liga jarraitzen dutenentzat, nola andaluziar batentzat hala Zaragozako batentzat, adibide baterako, ziur

Reala «kristoren taldea» dela, zeren kamerak non Realaren partidu ederra han. Eta arrazoi du, arrazoi handia eduki ere.

Urrutira joan gabe, telebistako pantailari esker, Real Madrid gutarren aurrean burua makurtzen ikusia dugu, Bernabeun beren zaleak eta Anoetan hemengoak lekuko izan direla. Nor ez da oroitzen, 1987-88 denboraldiko Kopako finalerdietako 0-4 hartaz? Nor? Esan, esan, nor? Hura gozamina, hura! Edo, berriz ere Bernabeun, 1993-94ko Ligako 0-2 hartaz? Realari telebistatik eskaini dizkioten partiduekin se-

gituz, gogoan izango dugu Athleticen kontrako 5-0 hura, ezta? Espainiako Canal + kateak eskaini zuen derbia, azken udal hauteskundearen egunean, aurtengo maiatzaren 28an hain juxtu. 5-0. Ez nuen ikusi. Hautesmahaian egotea tokatu behar niri orduan...

Ikusi ditugu telebistatik Donostiako ekipoaren partidu txarrak ere —iaz Anoetan jokatu zen Betisen kontrako Kopako 0-1 hura, kasu—, baina, oro har, arras talde telebisiboa da Real. Ea gaurko kapituluak afaria goxatzen digun. X